

欽定盛京通志

欽定盛京通志卷之一百十四

歷朝藝文 六

銘

贊

碑

祭文

墓誌銘

漢書

卷之

四

贊

論

通志卷之六

續通志卷之六十四

欽定盛京通志卷之一百十四

歷朝藝文

六

銘

大鳥銘

隋盧

綽

歲在壬申四月丙子皇帝底定海碣班師振旅

龍駕南轅鸞旂西邁行宮次於柳城縣之臨海

頓焉山川明秀實仙都也旌門外設欵跨重阜

帳殿周施降望大壑息清蹕下輕輿警百靈綏

萬福踐素砂步碧沚同軒皇之襄野邁漢宗于

河上想汾射以開襟望蓬瀛而載佇窅然齊肅  
藐屬殊庭兼以聖德遐宣息別風與淮雨休符  
潛感表重潤於夷波璧日曬光卿雲舒彩六合  
開朗十洲澄鏡少選之間儵焉靈感忽有祥禽  
皎同鶴鷺出自霄漢翻然直下高逾一丈長乃  
盈尋靡霜暉於羽翮激丹華於紫距鸞翔鳳峙  
鵠起鴻鶩或蹶或啄載飛載載徘徊馴擾咫尺  
乘輿不藉揮琴非因拊石樂我君德是用來儀  
斯固類仙人之騏驥冠羽族之宗長西王青鳥

東海赤鴈豈可同年而語哉竊以銘基華岳事  
乖靈異紀迹鄒山義非盡美猶方冊不泯遺文  
可觀况盛德成功若斯懿懌懷真味道如此感  
通不鐫名山安用銘異臣拜手稽首敢勒銘云  
來蘇興怨帝自東征言復禹績乃御軒營六師  
薄伐三韓肅清龔行天罰赫赫明明文德上暢  
靈武外薄車徒不擾苛慝靡作凱歌載路成功  
允鑠反旆還軒遵林並壑停輿海涇駐蹕巖陟  
宵想遐疑藐屬千里金臺銀闕雲浮岳峙有感

斯應靈禽効祉飛來清漢俱集華泉好音玉響  
皓質冰鮮狎仁馴德習習翩翩絕迹無泯於萬  
斯年

曾公祠銘

明 盧瓊

維帝御極柔遠能邇一夫不獲痍瘵是似蠢茲  
遼人不戢自焚公憫冥頑任禍於身敷奏祈宥  
脅從罔究帝曰俞哉銑拜稽首渠魁以殲衆感  
以祐保茲東土如翼如覆帝曰都哉陟茲功懋  
銑拜稽首天子萬壽農不易業市不易肆以生

以育維公之賜維岡有柏維麗有砥繩之鑿之  
維公之祠公惟信宿留公之似我其夙夜罔不  
敬止匪我思之子子孫孫匪民思之既浹且淪  
匪公之惠惟帝之仁遼其奠安於萬斯春

(贊)

進雙白鷹贊

唐蘇頌

開元乙卯歲東彝君長自肅慎扶餘貢白鷹一  
雙其一重三觔有四兩其二重三觔有二兩皆  
皓如練色斑若彩章積雪全映飛花碎點所謂



金氣之英瑤光之精高髻偉臆長距秀頸奮發  
而銳堅剛則厲摩天絕海電擊颺逝觀其行時  
令順秋殺指麾應捷顧盼餘雄當落雕之賞蔑  
讎鷄之敵實希代之尤也皇上祗膺聖圖欽若  
王道方寶賢重穀尊儒養艾後宮撒錦繡前殿  
焚珠玉與王侯卿士朝夕論思異無所貴輕衛  
公之好鶴奇無所珍同漢皇之却馬敗豈務於  
馳騁獵以存乎蒐狩未嘗合圍掩羣載羽灑血  
乃彊不攫而猛不噬矣然以萬方入貢懷其來

也三年重譯嘉其至也故仁爲之心有仁則勇  
威爲之力有威則重况此鳥猛過於衆重倍於  
凡禮於君則勸忠祭於祖則立敬壯其體則用  
武絳其翼則成文彼寵而服之鵠也能果榮而  
戴之蟬也能潔矧乎職命司寇師維尙父聞箴  
刺姦擇善爲吏蓋選士之是式匪從禽之足云  
此所以修於圖而儆在位也微臣奉制敢稱贊  
曰

鷹之大者精明竦峻勁而橫絕雄則遠振錦文

素綵珠聯玉潤往乃奮威將軍所狗鷹之次者  
勇銳光芒截海而至乘風載揚絡以紅聯文其  
綵章下鞞必中惟吏之良

(碑)

安東都護魏哲神道碑

唐楊炯

經天緯地之帝求制禮作樂之才撥亂反正之  
君資拔山超海之力繼詔下而崇號謚非無陣  
戰之風披皇圖而稽文武或用干戈之道故能  
彌綸宗廟彈壓山川包四海以爲家一六合而

光宅是以二十八宿懸列將而察休徵三十五  
星聚天軍而赫符彩呂望垂竿於渭涘道峻匡  
周張良授履於圮橋功崇佐漢乃有心如鐵石  
氣若風雲洛讖書名河圖秘象青絲雷燭歷大  
塊以三休碧羽霜淒倚渾天而一息岑彭許允  
征南鎮北之名馮異王昌大樹中軍之號杜太  
行而泥函谷猛氣無前戮封豕而斬長鯨雄圖  
不測元戎十乘驅衛霍以前矛甲士三千列孫  
吳於後殿秋風白露執金鼓而齊六軍泰山黃

河析銅符而光百代建廟堂之策爲社稷之臣  
孰能與於此乎在我眞將軍矣公諱哲字知人  
鉅鹿曲陽人也七代祖靖非前秦征北大將軍  
鎮北地上郡其後子孫因居於寧州襄樂縣開  
國承家之始誕性命氏之源大名發於本支當  
塗峻於層構三辰鬱鬱天街分畢昴之都九野  
茫茫地險裂山河之境丞相以萬幾論道匡大  
運而震威嚴尙書以八座當官贊金行而標領  
袖文昭武穆方駕齊驅公子王孫朱輪華轂大

鵬垂翰馭風伯而指南溟天馬騰姿按雲師而  
集東道祖唐隋天水郡丞河陽都尉瑤林瓊樹  
擢標格以千尋圓折方流委波濤而萬頃雄飛  
有望豈惟京兆之丞陰德不憊何直丹陽之尉  
父寶皇朝通議大夫總管府司參軍事東家孔  
子至德生於上天南國申侯明靈誕於中岳居  
朝翊贊道先王之法言公府弼諧對上天之休  
命若夫聖人作而萬物覩元首明而庶事康日  
月粲亦光華山川鬱其雲雨則有英靈間出丹

陵諧白鳳之祥符瑞挺生黑帝感蒼龍之傑隨  
珠一寸魏后揚眉和璧千金秦王動色顏生殆  
庶聞於竹馬之年揚子叅元發自銅車之歲建  
晴峰而直上疏碧海以橫流彫牆則百堵皆興  
峻宇則千門並列可大可久無忘簡易之途爲  
子爲臣率由忠孝之境郭林宗之披霧豈敢名  
言孔文舉之欽風每相推薦若乃五材並用誰  
能去兵七德兼施止戈爲武出師於九天之上  
暗合兵書取睽於十日之前懸符射法固以文

武之道揄揚滿於城中將相之才籍甚聞於海  
內貞觀十五年起家補國子博士喬林掃日驚  
白鳳於詞條璧水激天駭彫龍於義壑班超慷  
慨常懷萬里之心季路平生每負三軍之氣十  
六年勅授左翊衛北門長上祿賜同京官仍令  
爲飛騎等講禮鄧司徒之舊事馬上讀書祭征  
虜之前聞營中習禮宮花如錦還臨拜將之壇  
槐葉成帷復對聞軍之市自皇天眷命大帝應  
期運璇衡而制八方調玉燭而臨四極元菟白



狼之野來奉衣簪蟠桃析木之鄉尙迷聲教太  
宗文皇帝操斗極把勾陳因百姓之心問三韓  
之罪勝殘去殺上馮宗廟之威禁暴戢姦下藉  
熊羆之用公丹心白刃本自輕生六郡三河由  
來重氣烏江討逆剖項籍於五侯鹿野懲姦磔  
蚩尤於四豕二十年詔除遊擊將軍右武侯信  
義府右果毅都尉長上如故顯慶二年以內憂  
解職痛深吳隱哀極顏丁踏厚地以崩魂訴高  
天而泣血紫泥垂換頻降璽書墨綰臨戎遂從